



Kalaallit Nunaanni pinerluttulerineq pillugu inatsisip aamma Kalaallit Kalaallit Nunaanni eqqartuussisarneq pillugu inatsisip allanngortinneqarnissaanut missingiummut Namminersorlutik Oqartussat tapersersuinissaat pillugu Inatsisartut aalajangiiffigisassaattut siunnersuut (Oqarasuaatikkut nalunaaruteqartarneq, kalaallit nunaanni pinerluuteqarsimasunut inissiisarfinni pissaanermik atuineq, kiisalu palleeqqusinnginneq, sumiiffimmeeqqusinnginneq peersitaanerlu il. il.) aamma palleeqqusinnginneq, sumiiffimmeeqqusinnginneq peersitaanerlu pillugit inatsisip Kalaallit Nunaannut atuutilernissaa pillugu peqqussut aamma pinerlunnernik eqqugaasimasunut naalagaaffimmit taartisiaqarnissaq pillugu inatsisip allanngortinneqarnera.

(Ilaqutariinnermut, Naligiissitaanermut Isumaginninnermullu Naalakkersuisoq)

(Siullermeernera)

Demokraatini siunnersuut manna akuersaarparput aamma nuannaarutigearput kiisami periarfissaqaleratta kanngutsaattuliortartut sukkanerusumik peersittalernissaannut.

Isumaqarpugut tamanna persuttaasarneq pillugu pilersaarummut naapertuuttoq, inuiaqatigiinnut inatsistigut illersugaanissaannut pingaartitsinitsinnut aamma inuiaqatigiittut ingerlavigerusutatsinnut.

Pingaanginnangilaq tamanna inuiaqatigiinnut nalunaarut kisianni aamma pingaaruteqarluinnarpoq nalunaaruteqarnitsinnut malitseqartitsinissarput periutsit aalajaatsut atorlugit uani siunnersuummi siunnersuutigineqartutut.

Malersuisartut, akorngusersuisartut il.il. erloqinerulissapput aamma politiit eqqartuussivillu periarfissinneqassapput taamatut unioqqutitsisoqarnerani iliuseqarnissaminnut.

Inummuk kornngusersuineq, malersuineq aamma nikanarsaaneq inuiaqatigiinni mikisuni soorlu Kalaallit Nunaanni sumiiffinni amerlanerni taamaattoq, sakkuuvoq sakkortoq persuttaanissamut imaluunniit tarnikkut persuttaanissamut, inummik ima angitigisumik aseruisinnaasumik -



immaqalu ilaanni sakkortunerusinnaasartumik - allaat timikkut persuttaanermik sakkortunerusinnaasarluni. Minnerunngitsumik inatsisip matuma qularnaassavaa, kinguaassiutitigut kanngutsaattuliortartut peersinneqarsinnaangornissaat, inatsit sakkugalugu angerlarsimaffinniit najugaqarfigisaannit.

Tarnikkut malersuineq taaguutaavoq paasiuminaatsoq, paasisimangikkaanni; kisianni tamatumani pineqarput ilaatigut; ornigunneq, malersuineq, sianerneq, allanik akerartuineq - tassa inunnik nakkutilliineq, sms´erneq imaluunniit inummut kanngutsaattuliortartup ersiortissallugu aalajangiussaanut qanittumiinneq. Ersiortitsisoqarsinnaavoq assak kivillugu annersitsinngikkaluarluni.

Demokraatini suli annertunerusumik ingerlaqqikkusuppugut allaat inatsisissatut siunnersuummut uunga ilanngukkusussinnaallugit qarasaasiakkut malersuineq aamma internetikkut attaveqartarneq, ineriartorneq sillimaffigerusullugu.

Tamatumani immikkut eqqarsaatigaagut meerartagut aamma qarasaasiakkut inuit naapittarfii. Kinguaassiutitigut kanngutsaattuliortartorpassuit aamma meeqqanut asannilersoortartut aalajangiussatik qarasaasiami inuit naapittarfiini ujartarpaat soorlu facebookimi, chattertarfinni imaluunniit allani.

Tassa imaappoq meeqqat pisisarpaat imaluunniit inussuttut paasiuminaatsumik uukapaatitsillutillu pilerisaaralutik.

Angajoqqaat ullumikkut paasigunikku qitornartik kanngutsaattuliorfigineqartoq, qarasaasiakkut taamaattumit kissaatiginangitsumik attavigineqartartoq, taava periarfissakittuaraapput inuup taassuma pallitsaaliornissaanut, kisianni Demokraatini isumaqarpugut , tamatumani suli pineqartoq meeqqamut kanngutsaattuliorneq aamma inuinnartut inuunermut ajoqusersuineq.

Aamma qarasaasiami inuit naapittarfiit atornerarsinnaapput inunnik inersimasunik malersuineranut aamma tarnikkut persuttaanermut, taamaattumik siunnersuutigaarput, malersuinerup nassuiarneranut aamma ilaatinneqassasoq qarasaasiap silarsuaani iliuuserineqarsinnaasut.



Sumiiffimmeeqqusinnginnermi oqartussaasut aamma aapparisanut persuttaasartunut sumiiffimmeeqqusinnginneq atorsinnaalissavaat, tamatumanili pisariaqarpoq politiit pikkorillutik immikkut suliniuteqarnissaat - imatut paasillugu - politiit immikkoortissinnaasariaqassagaat sallulluni pisuutitsiniarnerit, uukapaatitsiniarnerit ilaalu ilanngullugit, kanngutsaattuliortunit atorneqarajuttartut. Kanngutsaattuliortartunut pissaanermik atuinerit ilangissanngilaat uanilu eqqarsaatigaarput ilinniartitseqqinnissaq, politiinngorniat atuarfianni tarnip pissusaanut ilinniarnerup annertusarneqarnissaa imaluunniit manna siunnersuut pissutigalugu allanik malitseqartitsisoqarumaartoq.

Immikkut iluaqutaasinnaavoq politiit ilinniartuuppasut pissaanermik atorerluineq, inuup ilisarnaatigippagit pisuujumanningineq persuttaasarnerlu, PTSD-t ilisarnaatit aamma uukapaatitsiniartuuppat nakkutilliiniartuullunilu - sulisut pillugit tarnikkut artornarsinnaammaat aamma immiini nassaarineqarsinnaammata qulaani nappaatinut taaneqartunut assigusut - aamma assortuunnerni ataasiakkaani ataasiakkaat paasisoorsinnaajumallugit pisunilu taamaattuni aalajangiisinnaajumalluni pitsaasunik - ilisimasat tunngavigalugit aamma piginnaanerit assortuunnernik takunnissinnaanermut aamma annerulersitsinnginnissamut. Kissaatigaarput tusarfiginerunissaa aamma ajornannginnersoq.

Oqarasuaatikkut nalunaaruteqartarnermut aalajangersakkat eqqarsaatigalugit saqqummiunneqartunut isumaqataavugut, tassani Naalakkersuisut allannguillatsiarnikuupput nalunaaruteqartussanik pisariaqartitsineq naapertorlugu toqqaasoqarsinnaanngorlugu aamma eqqartuussiviup iluani.

Isertitsivinni pissaanermik atuisinnaanermut tunngatillugu aamma sualummik qasilitsumik serparsaatinik atuisoqarsinnaalernissaa pillugu Demokraatini isumaqarpugut tamanna pisariaqartoq pissaanermik atuisinnaanerup annertusinissaani. Ajoraluartumik. Qasilitsumik serparsaat pissaanermik atuissutigissallugu sakkortuvoq, sunniutaali sivikitsuummat qaangiuttarlunilu aamma Demokraatini isertitsivinni paarsisut politiillu tatigigatsigit, isumaqarpugut inissaminiittoq pissaanermik atuisinnaanerup annertusinissaa.



Pineqaatissiisarneq ataqqinarsiseqqiinnermik tunngaveqareerpoq aamma tassa imaappoq politiit isertitsivinnilu paarsisut perulluliortoqartillugu aqukkuminaatsumik ilungersorulussinnaasarput - kisianni qujanartumik - piffissami sivikinnerusumik sivisunerusumiluunniit annertuumik persuttaasartut tarnikkullu nappaatillit ikittunnguit isertitsivimmiikkallartillugit.

Pissaanermik atuinerusinnaalernissamut pisinnaatitsissutit sakkussatut pitsaasutut isigaagut, qulaarnarneqassammat isertitsivinni paarsisut sullivimminni avatangiisaat.

Politikerit uangut isumaqaraluaruttaluunniit ilisimasaqarluta pinerluttunik sullissinerup qanoq oqimaatsigisinnaaneranut, puigussanngilluinnarparput Kalaallit Nunaanni inunnik isumaginninnerup iluani sullissinerup tamakkiisuunngikkaluamik

kukkuluttorfigineqarsimanerata kingunerimmagu inuit innarlerneqarnerat ima sakkortutigisumik allaat sakkut pisagut atorneqartariaqalersinnaallutik.

Aamma puigussanngilarput pissaanermik atuisinnaanerulernermut ilaatinneqassammata ataqqinarsiseqqiinnermik suliniutit sulii ingerlasut.

Tassa matumani taamaallaat pineqarput ajutuuttoqartillugu iliuuserineqarsinnaasut aamma inatisissatut siunnersuummi allaaserineqartut.

Inuit tungujortunik atortut ikiorsinnaasariaqarpagut inuiaqatigiit tapersersuinissaannik pisariaqartitsisut.

Naggataatigut nunami maani politiit, isertitsivinni paarsisut, kommunefogedit aamma eqqartuussiviit qutsavigerusuppagut suliaat annertoq pillugu - aamma kissaappagut paariuarumaaraatigut - imminnullu.

Taamatut oqaaseqarluta Demokraatini inassutigaarput inatisissatut siunnersuut manna akuerineqassasoq. Kissaatigaarput siunnersuut Inatsisunik atortitsinermut ataatsimiititaliami suliareqqinneqassasoq aappassaaneertinnagu.